

佛說進學經

宋居士沮渠京聲譯

聞如是一時佛遊舍衛祇樹之園須達精舍
大賢衆千二百五十人佛告諸比丘有四雅
行智者常遵丈夫所修達士恒奉不才愚夫
所不好樂何等爲四孝事父母悅色養之守
仁行慈終始不殺惠施濟乏未曾悋逆遭值
聖世捐榮履道是四雅行智者所遵丈夫所
修達士所奉不才愚夫所不好樂佛時頌曰
智者稱孝愍念慈活放施普給超俗崇寂
如是正業明士所習聖見已具定至無爲
佛告比丘復有二法若在閑宴或處大衆必
行莫懈一者靜寂賢聖默定二者博學講論
邃義又有二施飯食美味以安身命敷散經
典開微悅聽食施安身法施遷神二事雖快

法施爲最是以比丘念演妙法宣慧莫癡既
自洗濯并淨塵著如是道法永度無窮乃名
出家具足覺了佛說竟比丘歡喜作禮受教

佛說進學經